



PREPARAZIUN SIN L'EMPREDISSADI U SIN INA SCOLA CUNTINUANTA

Has ti chattà ina piazza d'empredissadi u es ti t'annunzià/t'annunziada per ina scola media? Super! Lura pos ti uss ta preparar sin l'empredissadi u sin la scola media.

Cumenzament da l'empredissadi

Il pass da la scola a l'empredissadi munta intgin midament. En l'empredissadi es ti ina part dal team, empredas da lavurar en moda independenta e surpigliar responsabladad. Sper ir a scola vas ti er a lavurar. En l'ultim onn da scola vali la paina da suandar bain l'instrucziun. Quai levgescha il cumenzament da la nova furmaziun, che cumbinescha la scola e la lavur.

Maturitad professiunala durant l'empredissadi (MP1)

Cun fitg bunas prestaziuns da scola po vegnir absolvida la maturitad professiunala durant la furmaziun professiunala da basa. La MP 1 sa drizza a giuvenils ch'èn fitg ambizius. Ella cumplettescha l'empredissadi da 3 u 4 onns cun dapli savida generala e pussibilitescha l'access ad in studi ad ina scola auta professiunala e/u via la passarella a l'universitad. Las studentas ed ils students da la MP 1 visitan sper la furmaziun pratica en lur manaschi per regla dus dis ad emna l'instrucziun a la scola professiunala ed a la scola da maturitad professiunala.

Il consentiment dal manaschi d'empredissadi ed in examen d'admissiun reussì pussibiliteschan la visita da l'instrucziun da la maturitad professiunala. L'ultim termin d'annunzia è per regla fin da favrer / entschatta da mars. L'examen ha lieu il cumenzament d'avrigl.

► Ulteriuras infurmaziuns chattas ti sin il fegl d'infurmaziun «Maturitad professiunala durant l'empredissadi MP1» u sin furmaziunprofessiunala.gr.ch → Documentaziun → Cussegliaziun da clamada, studis e carriera → Fegls d'infurmaziun.

Preparaziun a la scola professiunala

L'instrucziun a la scola professiunala sa cumpona da duas parts: da la part davart las professiuns, nua che la cumpetenza professiunala stat en il center, e da la part da la furmaziun generala, la quala promova il svilup persunal, tia cumpetenza sociala e tia savida da basa. Il cuntegn da l'instrucziun è determinà en la cunvegna da furmaziun, en ils plans d'instrucziun ed en ils uraris da furmaziun.

Ti chattas infurmaziuns latiers en il CIP, sin www.berufsberatung.ch sut tes mastergn d'empredissadi u directamain tar la scola professiunala che po er dar a tai scleriment davart l'instrucziun.

Organisar vestgadira da lavur

Per intginas professiuns dovri vestgadira da lavur speziala. I vegn recumandà da cumprar quella avant che cumenzar cun la furmaziun professiunala da basa per cumenzar bain preparà l'emprim di da lavur.

Paja durant l'emprendissadi

Cun il cumenzament da l'emprendissadi survegnis ti l'emprima giada tia atgna paja. Per ch'el possia vegnir pajà, dovri in conto da salari tar la banca u tar la Posta. Uschè prest sco ti survegnis tia emprima paja d'emprendist sa tschenta la dumonda per tge che ti vuls spender tala. Cun agid dal calculader da preventiv pos ti planisar tias expensas e vesas quants daners da satg che vanzan: www.budgetberatung.ch/budgetrechner

Dretgs e duairs durant l'emprendissadi

Sco emprendist u emprendista has ti da princip ils medems dretgs e duairs sco ils ulteriurs lavurants e las ulteriuras lavurantas. I sa dattan però differenzas ed excepziuns perscittas spezialmain en connex cun il caracter spezial da la relaziun d'emprendissadi. Las pli impurtantas infurmaziuns en chaussa survegnis ti sin il fegl d'infurmaziun che vegn consegnà a tai ensemen cun il contract d'emprendissadi. Ti chattas el er sut furmaziunprofessionala.gr.ch → Documentaziun → L'inspecturat professional → Chaussas generalas. Mussavias chattas ti ultra da quai sin www.furmaziunprof.ch u en il CIP.

Preparaziun a la scola media

- Has ti gia absolvì cun success ils examens da recepziun da las scolas medias u has ti pir da far quels? Sche ti has anc da far l'examen, ta pos ti t'infurmar sut www.ahb.gr.ch.
- Sas ti gia tge tip da scola media che ti elegias? (Gimnasi, SMS, SMC, SMI)? Ils fegls d'infurmaziun CIP pon gidar tai da ta preparar optimalmain sin in dals tips da las scolas medias.

Na es ti anc betg ta decidida/decidì u dovras ti sustegn tar l'elecziun dals roms? La cussegliaziun da professiun sustegna gugent tai latiers.

Infurmaziuns tar las scolas medias èn accessiblas sin ils fegls d'infurmaziun dal CIP, tar l' Uffizi per la furmaziun media-superiura u directamain tar las scolas correspondentas.

► furmaziunprofessionala.gr.ch → Documentaziun → Cussegliaziun da clamada, studis e carriera → «profilo» → 2. s'orientar.

Abitar durant la scolaziun

Tut tenor nua che ti chattas in emprendissadi u nua che ti visitas la scola professionala u media, dovras ti forsa ina pussaivladad d'abitar. Alloschis per emprendistas ed emprendists porschan albiert e dunsena per in pretsch bunmartgà. Ina glista da tals alloschis è disponibla sut furmaziunprofessionala.gr.ch → Documentaziun → Cussegliaziun da clamada, studis e carriera → «profilo» → 7. sa preparar u en il CIP.

► Ulteriuras infurmaziuns

e sustegn survegnis ti en il CIP. L'adressa dal CIP en tia vischinanza chattas ti sut:

furmaziunprofessionala.gr.ch → Sur da nus → Lieu ed adressa → Cussegliaziun da professiun, da studi e da carriera,

e-mail: biz@afb.gr.ch